

# Jeimsre Quraŋ

## Jeimsji Quraŋine ruame.

### Mimitaniŋ

Moreŋine moreŋine oo ŋiŋigo fuŋne fuŋne maŋyaŋuŋ kerisieru qowirieegobi, yoŋore eeboboyaŋuŋji jjiibu fukeko batataŋgaru waki yabeko Anuture tinabiŋeji egu wakiŋ. Ore eru Jerusalem bisop Jeims iŋoji kajeqouŋ buŋo furuine furuine roku qodureru yo quraŋgaga. Kajeqouŋ buŋoine goine oi iŋi: Maŋboronŋ foriine oi uruŋu? Zioz gio foriine eru ikoine. Eesoi maŋineo gogo. Goine so ŋone sure yabeinebi. Mi bibiŋaŋuŋ siŋaŋ ganiŋ. Sakiŋaŋuŋ miteŋ ganimiŋ me maŋ-ŋaŋuŋ bawaki enimiŋ? Kekepari me ogo babapi enimiŋ? Yameŋ keku oŋgawowosi gio bainebi.

Manebuine qoruine oi iŋi: Kristore Biŋe buŋoineji sogueru kuririineke fukeiŋ ore tina osi-garu buŋoine kegboreru babeneŋ foriine fukeiŋ me mata? Mi mau bibinoŋuŋji akonŋ manesiŋ gagobeneŋ mikabeneŋ so sagaga. Zioz gio foriine tomiri, oi zioz komekiine.

#### **Quraŋ yoore mobe qoruine 10 oi iŋi:**

Buŋo fuŋfuŋgaine *1.1*

Mamanesiŋ eru maŋboronŋ *1.2-8*

Ŋiŋigo wakiqoqoine eru tinabiŋeineke *1.9-11*

Eesoi eru baesoi *1.12-18*

Biŋe kajeji akonŋ manemiŋ me reŋgamiŋ *1.19-27*

Wakiqoqoine oi so ŋone sure yabeinebi *2.1-13*

Mamanesinḡ gioine tomiri oi omaine fukega  
 2.14-26  
 Namaḡḡonḡunḡi egu sibiri nobeiḡ 3.1-18  
 Womoo gogo me morende eebobo 4.1-5.6  
 Yobiḡ osigaru oḡga wosikabeneḡ foriine fukeiḡ  
 5.7-20

<sup>1</sup> Jeims nonḡi Anutu eru Ofonḡ Yesu Kristore gio baku gogo. Israel ḡoko 12 nonḡundeone goine ḡoḡo Israel bokeru moreḡine moreḡine roiḡgaru raru gogobi, nonḡi ḡoḡoke buḡo mimane ekimiḡ ore quraḡ yo quraḡgaru miḡeriḡaḡuḡ migo.\*

*Manesinḡ garu oḡga wosiru mamane foriine bofukekiminḡ.*

<sup>2</sup> O maḡkekerisie ogopune, mamanesinde eesoi funḡe funḡe painḡaḡuḡo ropeega, ore eru maḡ-ḡaḡunḡi so wakiko kiwaḡawaineke akonḡ maneru jerieru goinebi. <sup>3</sup> Eesoiḡi painḡaḡuḡo ropeko oo mamanesinḡ-ḡaḡuḡ sananḡako yameḡ keku koboru dimainebi. Oi manegobi ore jerieru goinebi. <sup>4</sup> Yameḡ keku dimaniminḡ ine, oiḡi jikigaru ḡowirie ḡabeko eeboboḡaḡuḡ foriine sosowo oi kuririineke fukeeiḡ. Onḡ fukeme Anutuḡi senḡinḡbanḡinḡineḡi maḡ-ḡaḡuḡ bofuseko mande ya more so basiḡasi eru gonimiḡ.

<sup>5</sup> Nonḡoreone moḡi “Uruḡu enobo?” miku maḡḡboronde embimḡinḡaga, inḡoḡi Anutu oḡga wosiko oi oteiḡ. Anutuḡi yaunḡine oi wiriine sosowo noreru urugo so minoreinḡo maneega. Ore eru oi soine oteme raugaiḡ. <sup>6</sup> Onḡa wosiinḡ, oo nareiḡ, onḡu manesinḡ garu maḡyoka so yobu

---

\* **1:1:** Mat 13.55; Mak 6.3; Apo 15.13; Gal 1.19

eiŋ. Moji manyoka ega, iŋoji koe tembon ɔnuine rope wakiega. Gbinji koe kukugaru kosabasa ra wareega. Ore so egu fukeiŋ ore ɔŋgawowosiine ore manyoka so eiŋ.

<sup>7</sup> Manyoka ŋiŋigo ɔnuine Ofonji ya oteiŋgone so manesuiŋ. <sup>8</sup> Injore manji pougako eeboboine sosowo oiji denaŋdenaŋ eru tuturi qaku buŋo raro warero miega. Oŋu.

### *Wakiqoqoine eru tinabiŋeke gogo*

<sup>9</sup> Maŋkerisie ogopune, ŋoŋore botugo goineji wakiqoqoine gobi Anutuji yoŋore maneko ropekiine fukega. Ore eru soine ŋoŋo-ŋaŋe mimiten eeinebi. <sup>10</sup> Goineji ropekiine gogobiyon, monen meboyaŋunde so manebi ropeega ore eru wakiqoqoine kamasi goku yoŋoyoŋe mimiten eeinebi. Yoŋore gogoyaŋunji boro iruine ore so fukeru qaŋiŋ. Wakiqoqoine eru ropekiine nonuŋ komekimin, oo sogokon fukekimin.\*

<sup>11</sup> Wegiji waperu boro rigako kaŋkaŋgaku gbaŋiru iruineji mukuru wakiega. Iruineji wakiko botuinere mosiine ŋone aŋiineke oiji tatakiine fukeega. Tinabiŋeyaŋunke yoŋoji meboyaŋun basauenimin ore oruŋoruŋ keegobiyon, goku boro ɔnuine gbaŋinimin. Oŋu.

### *Eesoi eru baesoi*

<sup>12</sup> Anutuji buŋoine inji kipeme pega, “Niŋigo manyaŋunji jojoko enaregobi, nonji oi gogo sanaŋine yareru qoruyaŋunŋo goul hendiŋ keyarebemin.” Buŋo ore so sembenere eesoiji more paiineo ropeko oo yamen keku

---

\* **1:10:** Ais 40.6-7

sanaŋgako tariko gogo sanaŋinere resoŋ buresoŋ raugaru seŋŋinbaŋŋiŋ fukeiŋ. Injore “Ii-ia kiwaŋawaineke!” migobeneŋ. <sup>13</sup> Sembene Rauineji Anutu eesoŋ bateinde so, so fukeme Anutuji mo agiburaŋ eiŋ ore so eesoŋ bateiŋ. Ore eru moji eesoŋ maŋineo goku inji so miine, “Anutuji eesoŋ ba nareme agiburaŋ eiŋgo ego.”

<sup>14</sup> Anutuji matayoŋ, noŋunde aŋinoŋuŋ sanaŋine sembeneji bitiŋ oŋuine furu nobeko subare buduŋineo quŋgakabeneŋ agiburande eesoŋ oŋu moakoŋ moakoŋ noŋunde fukeegobi.

<sup>15</sup> Moji aŋiine sanaŋine sembene so kipega, oi agiburaŋ bofuke ega. Bofuke eme aŋiine sanaŋineji kuagaru agiburaŋ oi odumade oŋuine roko fukeegobi. Agiburaŋji fukeru sogue foreko kome sanaŋine fuke teega.

<sup>16</sup> O yoro ogopune, aŋiŋaŋuŋ sanaŋine sembeneji so eadu ŋareine. <sup>17</sup> Yauŋ fiine kuririŋaŋuŋke sosowo oi Anutuji ruame Sombuŋ paibeone fukeega. Kaiŋ eru wegi jiŋoyakuŋ waperu petigaru rakabire sasakoyakuŋji jororu bembey eegayoŋ, tatama sosowore Rauine iŋoyoye so qopieiŋ. Dabu me sasakoine moji oi injoreo so pega. <sup>18</sup> Anutuji ya sosowo bofukeya, niŋo yoŋore botugo bobosu gariine fukeru gokimiŋ ore maneya. Ore eru iŋoyoye aŋiinere so buŋo foriinere koruŋ maŋnoŋuŋgo sariko oiji fufuke gariine noreko fukebeneŋ. Oŋu.

*Bije buŋo omaine manekimiŋ me reŋgaru rokiŋiŋ?*

<sup>19</sup> O yoro ogopune, buŋo yo manesuku so niga ŋabeine: Ŋoŋo sosowo buŋo maneŋgo kaje

pipa ruainebi. Buño kosa oi pipa so miinebi. Mañ-ñañunji pipa so rigaŋgaigoñ. <sup>20</sup> Anutuji eebobo poretiñ ekiminde ajiine maneegayoñ, mañririgañji oi so kesoeega. Ore eru mañririgañ bokeru buño waigo miku goinebi. <sup>21</sup> Penaron fune fune eru eebobo wuwunuñinekeo qakato-gobi, oi bio bokeinebi. Noño qoqomukuñuñuñ bokeru Anuture buño ruruñaño raru buño koruñ mañ-ñañuño sariega, oi maneru sabareku goinebi. Onu ekabuñ buño oiji soine munan qa ñareko qowirieru Sombuño ropenimiñ.

<sup>22</sup> Biñe buño oi omaine yobu manebi foriine so egu fukeiñ. Onu keoma eru egu eadu eenimiñyoñ, buño oi kegboreru goinebi. <sup>23</sup> Moji buño omaine yobu maneru onu so eega, iñoji ñi yoore so fukega: Moji jiño maiine kukurao (hawario) ñone eega. <sup>24</sup> Ñone eru bokeru mogo raru kamasiine uruñune, oi pipa niga gaega. <sup>25</sup> Oi fiine matayoñ, moji kadi buño kuririineke ore kaje ruaru bibitatari eku oo qakatoru agiburande nigingone keñgoroñaega, iñore eeboboine ore “Ase kiwaqawaineke!” mikimiñ. Iñoji buño maneru oi so niga gaegayoñ, oi fofori reñgaru ore so eega.

<sup>26</sup> Moji mañkekerisiere kekegbore eiñgone miku mi bibi sisiine so siñañ garu iñoyoñe onu eadu ee eega, iñore mañkekerisiere Biñe gioineji ya omaine, foriine so fukeega. <sup>27</sup> Anutu Mamagore jiño maio mañkekerisiere Biñe gio gbagbataeñine keomaine tomiri baiñgone mige ine, iñi baigoñ: Begu mosiñ eru koje koñkoñ paiineo gogobi, oi raru ñone yaberu maño eyareko goigoñ eru

morende eeboboinere penaronjineji maŋgo egu kejjgainj ore sisinaj eru goigonj. Onju.

## 2

### *Wakiqoqoine oi so sure yabenij.*

<sup>1</sup> O maŋkekerisie ogopune! Yesu Kristo Ofonononuj kobiineke manesinj ganiminj ore migobi ine, nijigo goine so none anj eyareku goine so sure yabeinebijonj, somesa moakonjo osoe yaberu goinebi.

<sup>2</sup> Ore soso bujohne mo oi inji: Ni tinabiŋeineke moji, me sisiine goul maŋguineke eru kamban marikuine none anjineke, injoji bujo piyanunjo ropeko ni wakiqoqoine moji sakikomonje sugakiine wununjineke injoji onjakon ropena.

<sup>3</sup> Ropebire nonjo ni yoine none anjineke oi kepore teru inji miniminj, “O sogunenonunuj, go soine miineo paibe raru neŋe ronjunjineke oo nejigonj.” Onju miku ni wakiqoqoine oi noneru taki eru miniminj, “Go soine qanajineo raru dima me kufu ronjunjo wakiru nejigonj.” <sup>4</sup> Mosi onjine fukeko nonjo kufufun botunanunjo gan ruge ruaru boroinja eeru qaqosori eru bujoyanunje fukegobi. Mamanesunanunj sembene boyoberu mimitari nijigo kekesiine fukegobi.

<sup>5</sup> O yoro ogopune, maneninj! Anutuji qorumanjine nijigo manjoko eteegobi, yonore bine einjo ore bujohne misananjaru kipeya. Bujo ore so goineji moren nijigo yonore jinogo wakiqoqoine fukegobijonj, Anutuji oi injoyonunde rosoe yabeko mamanesinjanunde eru ropekiine

fukegobi. Yoŋoji qorumaŋinere maŋgo ropebi siŋaŋ yabeko meboyaŋuŋke fukeniŋiŋ.

<sup>6</sup> Fofori ropekiine fukegobiyon, ŋoŋo ŋiŋigo wakiqoqoine titiki ŋone yaberu gogobi. Niŋigo tinabiŋeyaŋuŋke yoŋoji ŋoŋo monen meboŋaŋuŋ tomiri ore bawaki ŋaberu jikiboti eŋarebi wakiqoqoine fukeegobi. Yoŋoji ŋoŋo furu ŋaberu buŋo koroine koroine oo ropeegobi. <sup>7</sup> ŋoŋo Kristore biŋe fukebi tina fiine sari oi ŋareru ore so miŋareegobiyon, tinabiŋeyaŋuŋke yoŋoji maŋkekerisie (kristen) tina oi kosa misembearu kisonŋaru ra wareru miegobi? Morende ropekiine yoŋoji oi sosowo baegobi.

<sup>8</sup> Oŋu baegobiyon, ŋoŋoji Anutu qorumaŋinere kadi buŋo qorune reŋgaru boyobebi sagaiŋ. Anuture buŋo oi Biŋe Quraŋgo iŋi pega: “Gake manji jojoko eege, ore so ŋiŋigo goine oŋuakon maŋgoo maŋyaŋuŋ eyareru manjoko eyareeigon.”\* <sup>9</sup> Oiji sagaiŋyon, ŋoŋo ŋiŋigo goine ŋone aŋi eyareku goine sure yaberu somesa moakonŋo so eyareegobi ine, agiburaŋ baegobi. Anuture kadi buŋo kigabi iŋoji buŋoŋaŋuŋ oi bofukeru mitari ŋarein. <sup>10</sup> Moji kadi buŋo sosowo reŋgaru boyobeegayon, oone mimipaŋ buŋo moakonŋo wakiru qaqa, iŋoji kadi buŋo sosowo kigaru buŋoineke fukega.

<sup>11</sup> Ore fuŋine oi iŋi: Anutu “Boesau so eigon,” miya, iŋoji oŋuakon mimipaŋ buŋo iŋi mitigaya, “Mo so qande komenon.” Go boesau so egeyon, jibu mo qande komega, oo kadi buŋo sosowo kiga foreru goge.\* <sup>12</sup> Anuture kadi buŋo oi agibu-

\* **2:8:** Lew 19.18      \* **2:11:** Eks 20.13, 14; Dut 5.17, 18

rande niginigone kenḡoronḡaru gokiminḡ ore pega. Anutuji kadi buḡo oo osoe noberu buḡonoḡuḡ mitarime posikeniminḡ ore manesuku buḡonoḡuḡ ore so miku goinebi eru eeboboḡuḡ manjijojoko paiineo eku goinebi. <sup>13</sup> Moji ḡinḡigo manjijojoko paiineo so ḡonemaiḡ yareru goinḡ, Anutuji inḡore buḡo osoeru ḡonemaiḡ paiineo so mitari teinḡ. Moji ḡinḡigo manjijojoko yaduru goinḡ, Anutuji oi osoe teru soine ḡonemaiḡ oteme kiwaḡawaineke fukeru sakiine ba ropeinḡ. Onḡu.

*Mamanesiḡ foriine tomiri oi komiine fukega.*

<sup>14</sup> O maḡkekerisie ogopune, moji “Yesu manesiḡ gago,” miku ore gioine so bako mamanesiḡine oiji uruḡu bapi gana? Buḡoineji akonḡ manesiḡ gako Anutuji ḡoneru munanḡ qame qowirieinḡ me mata? Oi mata! <sup>15</sup> Ore buḡoine mo oi inḡi: Maḡḡanḡuḡ kerisiebuḡ, ḡoḡore botugo ḡinḡigo moji kambaḡ kereḡ ore embimbiḡaru basiḡasi eku una moakonde so uḡo munḡanḡine tomiri gona. <sup>16</sup> Onḡu gokame ḡoḡoreone moji inḡoke qotururu sakire kikitinḡ so oteru inḡi ojime manena, “Go soine raru uḡo munḡanḡ nogu misi furaku waigo ḡeigonḡ.” Buḡo omaine oi maneko oiji uruḡu bapi gana? Oi mata yobu!

<sup>17</sup> Onḡuakonḡ mamanesiḡ omaine yobu oi komiine fukega. Mamanesiḡ giainere foriine so бага ore mamanesiḡineji qoḡḡbuḡ onḡu fukega.

<sup>18</sup> Moji inḡi mina, “Goji maḡḡo kerisiende nonji eebobo poretinḡ boyobeego.” Nonji ore eru inḡi gajigo, “Goji ‘Anutu manesiḡ gago,’ miku ore gioine so baku omaine mamanesiḡore foriine uruḡu nadunonḡ? Nonji maḡkekerisiere gioine



babe ñonende oiji soine nakene mamanesiñnere foriine gaduiñ.” <sup>19</sup> Go “Anutu moakonñ goga, oi manesiñ gago,” mige, oi fiine! Gemokaku yonjoji onuakonñ oi manesiñ gagobi. Oi manesiñ gago-biyonñ, oiji kukuga yareme Anuture manyanñunñ yoyowogaega.

<sup>20</sup> O ñi mañgo tomiri, go gemokaku yonjore kamasi onu manesiñ gaega me? Mamanesinde gioine so bande foriine so fukeko buño oi omaine yobu minde mamanesiñgoji ya omaine, foriine tomiri fukeega. Ore funjine oi soso buñone oiji gaduga me mata? <sup>21</sup> “Mata!” egu mimiñ ore eru soso buño mo mibemiñ. Mamanesinde funqodunonñunñ Abraham inoñji poretiñ urunñ fukeya? Inoñji Anuture mi renqaru madeine Aisak ogagaru raru korogo ruaru oo boji rigainñ ore eya. Onu eru mamanesiñ paiineo gio bako Anutuji oi ñoneru buñoine mitarime posikeya.\*

<sup>22</sup> Soso buño ore funjine oi ñone taniñgage me mata? Abrahamji manesiñ garu buño akonñ so miyayonñ, mamanesiñ paiineo dimaku ore mosiine onuakonñ qame mañgo eteko sagaya. Eebobo poretiñ eba eku gokame mamanesiñineji onu sogueru kuririineke fukeya.

<sup>23</sup> Biñe Qurañgo buño mo oi inñ pega, “Abrahamji Anutu manesiñ gako tinaine Nñ Poretiñ miya.” Buño oi ronekonñ foriineke fukeya ore so oi qurañgabi goineji Abrahamde tina “Anuture ogo,” onu mibi miku gobunñ.\* <sup>24</sup> Posiine fukekiminñ ore mamanesinde buño oi minonñunñji

---

\* **2:21:** Jen 22.1-14      \* **2:23:** Jen 15.6; 2 Hist 20.7; Ais 41.8

akon mikabenen so sagaga. Mosinoonji mananesinde eebobo foriine ekimin ine, Anutuji buonoonu mitarime posikekimin. Binañeji ore funine naduga.

<sup>25</sup> Soso buo mo oi onuakon mikabe mankerisie giore fune oi gaduin: Israel yonji moren none mukunimi ore ni yoyoka sore yapebi rabire kadi sogo nigo tinaine Reihab inoji oga yaperu mango eyateru kadi mogo rua yapeme rabu. Inoji mananesinde eebobo onu eko Anutuji oi noneru buoine mitarime posikaya. Onu.

<sup>26</sup> Nonji buone yo ini mitaribemin: Ni iurine tomiri oi qongbuine. Ore so mananesin gioboboine tomiri oi komiine fukega. Onu.\*

### 3

#### *Namanonunji egu sibiri nobein.*

<sup>1</sup> O mankerisie ogopune, nonoreone kokoineji man-nanun wapeko “Goine yonore baka botingakimin,” miku qaqaji, nrau fukekimin ore man-nanun egu pakerein. Niño goine qaji yareru nonunde mananesunonun so botingakimin ine, Anutuji oi noneme so sagako buonoonun osoeru sananine mitariru ore so goine odure norein.

<sup>2</sup> Oi ini ore migo: Nonun sosowoji kadi buo kokoine tirieegobenen. Moji namanine sinan garu buo so tirieega, inoji ni kuririineke yobu fukega. Inoji soine sananaru gogoin sosowo onuakon sinan garu goin.

<sup>3</sup> Kanenkuku (beosi) oi aninonun renjanimin ore eru aen migokiki miyanunjo esorieru kiperu

---

\* 2:26: Jos 2.1-21

niginji poreru oo soine foriyanun soguine sosowo oi babotin eyarebeneŋ raegobi. <sup>4</sup> Onuakon ogâ yasogo ore mosiyanun manesuinebi. Ogâ goine oi yasogo yasogoyon, jibu gbin sananeji oi kitiŋ yabebi koe petigaru raegobi. Yasogo yobu fukegobiyon, oi jibu rarainere siŋane kaptan inoji ogâ guruineo ŋeku anjine boyoberu stia (steer) qaŋaine mendaine ino akon babokiri eko ogâ yasogoji onu so kerisieru raega.

<sup>5</sup> Namande funne oi onuakon. Oi saki funonunde mobeine mendaine fukegayon, jibu soine buŋo soguine funne funne oo sakinoŋun ba ropeku miegobeneŋ. Go yo manesuku goigon:

Misi uuine mendaineji tarieru rakaru soine yojio gbedigaru gomeŋ yasogo yobu ja foreko wakina.

<sup>6</sup> Namaŋnonunji onuakon misi borun onuine fukega. Oi saki funonunde mobeine mobeine ore botuyanunŋo ŋeku penaronde kukure maŋgoine fukega. Onu fukeko misi koru Rauineji sipaineo qureru oo puteko afaine akon manjoji gbedigaru jako maŋine sosowo ketiqoti kejiŋako gogoineji eebobine sosowo oi wunun onuine goburein. <sup>7</sup> Anutuji ya sosowo bofukeya, oi joma funne funne, webo me ya yukuyanunŋo keku keŋonkeŋon egobi me koego gogobi, oi ŋiŋigoji bomunan yabenimin ore so fukegobi. Goine oi keporeku bomunan yabebi kaere joma fukegobi.

<sup>8</sup> Onu fukegobiyon, namaŋnonunji joma riganine onuine fukega. Oi oraben nombe onuineji pusekiine fukeru umumun onuine ŋiŋ ŋiŋ onŋaku kinobeku bokome nobeinŋo ore jaueega. Niŋigo sosowoji oi

bomunaŋgaru kipenimiŋ ore embimbiŋgaegobi.  
<sup>9</sup> Namaŋnoŋunji Ofoŋ Yesu eru Mama Anutu miteŋ yapeegobeneŋ eru aribe ŋiŋigo iŋoyoŋunde mosi oŋu bofuke yabeya, oi buŋo soweji kosa qaiso yabeegobeneŋ.\*

<sup>10</sup> Namaŋ moakoŋ oiji Anuture tina miteŋ gaegobeneŋ eru buŋo soweji goine qaiso yabeku miegobeneŋ. O maŋkekerisie ogopune, fuŋneyaŋunji oŋu peko so sagaga. <sup>11</sup> Obu jajaine eru mokiineke oi obu jiŋo moakoŋgone igomuruŋgaru wapeegobire me mata? Oŋu mata! <sup>12</sup> O maŋkekerisie ogopune, maŋgaŋgone jomuru (saŋ) oi soine fukeega me mata? Oŋuakoŋ geme yogone gudere soine fukeega me mata? Ore so obu waanine oi obu jiŋo jajaineone igomuruŋgaŋgo embimbiŋgaega. Oŋu oi.

### *Maŋboronŋ foriine eru ikoine*

<sup>13</sup> Ŋoŋore botugo moji maŋboronŋke fukeru buŋo botiŋgaŋ ore so fukega? Moji “Oŋu fukega,” minimiŋ ine, iŋoji maŋine oi maŋboronŋinere so bawakiru mosiineji munanine eeboboine yaduko totogo fukeko ŋonebeneŋ sagaiŋ. <sup>14</sup> Oiji sagaiŋyoŋ, maŋ-ŋaŋuŋgo manetiŋotike fukeru maŋji roroŋ eko maŋririgaŋ mokiineke maneru ŋadiŋoŋo eegobi ine, maŋboronŋ-ŋaŋuŋ ore so sakiŋaŋuŋ omaine yobu so ba ropenimiŋ. “Buŋo foriine boyobegobeneŋ,” miku ore foriine egu kesonŋanimiŋ. <sup>15</sup> Yoŋore maŋboronŋ oŋuine oi morende mamane-muku. Oi Sombuŋgone so wakiegayoŋ, gemokaku yoŋoji ŋiŋigo boburo

---

\* **3:9:** Jen 1.26

yabebi mikabuŋ Moro Tiriineji ore eru beusembe maneega.

<sup>16</sup> Uri yoŋore manyaŋunji manetiŋotike fukeru manji roroŋ eko maŋririgaŋ maneru ŋadiŋoŋo eegobi, yoŋore gogoyaŋunji jijibu popou eko mosi wuwunuŋineke fuŋne fuŋne boyobeegobi.

<sup>17</sup> Oi boyobeegobiyon, maŋgboroŋ Sombuŋgone wakiega, ore fuŋine fuŋfuŋgaine oi eebobo gbagbataeŋine. Maŋgboroŋ gbagbataeŋinere mosi goine oi inji: Womoo gokiminde aŋi pe yareko munane paiineo goine manjijojoko eyareku buŋo rurumaŋgo rakabi Moro Tiriineji maŋ-ŋaŋuŋ puŋeko goine ŋonemaŋ eyarebi maŋmamaŋeŋaŋunde fori fiine fiine oi kokoine fukeega. Mipemiriŋ bokeru ŋiŋigo buŋoyaŋuŋ mobeine sowo so osoeru sakiŋi akon oogo so gogobi. <sup>18</sup> Womooŋoŋo ŋiŋigoŋi womoo gonimiŋ ore maneru ore koruŋ saribi foriine eebobo poretiŋ fukeko seŋgiŋbaŋgiŋ goegobi. Onu.

## 4

*Morende mamane-muku bokeru Anuture ogo fukeru goinebi.*

<sup>1</sup> Wamo yaji jigo eru kekepari kesueko botuŋaŋuŋgo fukeega? Ŋoŋo-ŋaŋunde aŋi sanaŋineji bio pakereru saki fuŋaŋuŋ sagako fiine eru sembene yokoŋi fufuru ekabire jigo eru kekepari fukeega. <sup>2</sup> Ŋoŋo ya fuŋne fuŋne roniminde aŋi sanaŋine biabia maneegobiyon, oi ŋoŋore biŋe so fukeega. Yare ŋoneaŋi maneru anda eru maŋ-ŋaŋuŋgo jo jako ŋiŋigo yabebi komeegobiyon, jibu oi so roegobi. Ore eru

kakane miku kekepari eku jigo qaegobi. Nono Anutire so onga wosiru nono-nane omaine banimiŋ ore manegobi, ore eru oi so biŋe qoqo eegobi.

<sup>3</sup> Anutire onga wosiegobiyoŋ, jibu oi yoore eru so roegobi: Maŋ-nanunji so poretiŋgame ya nareme oi bojiburu nono-nanunde aninanun sananine sembene bomukuku saki funanunde jeri enimiŋ ore maneru kariiegobi. Oi so sagako Anutuji oi sabareega. <sup>4</sup> O nono jikiboti niŋigo onu fukegobi. Noe nonun kadi poretiŋ bokeru boesau eegobi, nono ore so Anutu bokeru maŋkekerisiere yauraine niŋigo yonoke oogo eku moneŋ meboji akon maŋ-nanun kiperu gogobi. Kamasi onu eru oo Anutuke rorosi eegobi. Oi mane mukugobi me mata? Ore eru moji manine morende ani sananine sembene bomukuiŋ ore eega, iŋoji Anutire rosiine fukega.

<sup>5</sup> Biŋe Qurande buŋo mo oi iŋi quraŋgabi pega, “Moroine Tiriine maŋnonunŋo rua noreme goga, Anutuji oi aniine sananine oiŋi puseko goga.” \* Buŋo oi omaine funine tomiri onu egu manesunimiŋ. <sup>6</sup> Buŋo oi omaine matayoŋ, nono ore so aninanun poretiŋ Anutire enimiŋ ine, iŋoji yaunmoririine mokemoke yobu nareeiŋ. Ore eru Biŋe Quraŋ yo miku quraŋgabi pega: “Anutuji sigopou niŋigo kiso eyareegayoŋ, maŋ-nanun bawaki egobi, oi yaunmoriri nareega.”

---

\* **4:5:** Biŋe Quraŋ buŋo ore funine mo oi iŋi, “Moro Tiriine maŋ-nanunŋo ruame goga, iŋoji manjoko enoreinde ani sananine maneru nonunde ore manetiŋotike maneegea.”

<sup>7</sup> Ore so ñoño mañ-ñañuñ osoeru Anutüre buño rurumaño raru goinebiyoñ, Sembene Rauine kiso etebi boke ñaberu useru rauseiñ. <sup>8</sup> Ñoño Anutuke jojofu eku bembengo warekabuñ iñoji ñoñoke jojofu eku mañfuñ-ñañuñgo dimaiñ. Ag-iburañ babi menañunji gobureme Yesure dari-ineji oi jureiñ ore oña wosiinebi. Mañ-ñañunji pougako raqo-wareqo kosa ebi mañ-ñañunji ke-jigako kekeririke ñabeme gbagbataeñine fukeni-imiñ ore oña wosieinebi. <sup>9</sup> Ñoño tifaruruñañuñ mane mukugaru jingey keku beusembe maneru jojoraku kuyoinebi. Goue kiwaqawañañuñ bokeru kerisieru soguñ bainebi. Jeriñañuñ bokeru beusembe mamane einebi. <sup>10</sup> Ñoño Ofonde jiuo babawaki ee ebi iñoji romaen ñabeñ. Onu.\*

*Mañkekerisie ogopuñuñuñ yonore buñoñuñ so mitariinebi.*

<sup>11</sup> Mañkekerisie ogopune, ñadiqoqo buño so mimi eeku goinebi. Moji buño onu miku kisongaru mañkekerisie ogoinere buñoine mitariga, iñoji Anutüre kadi buño mitariru ba waki ega. Go Anutüre kadi buño mitariru qañañineo ruaru onuine oo oi so reñaegayoñ, oi keoma eru eadubobo ñi fukeru goge. <sup>12</sup> Anutuji kadi buño mitiga noreru ore so buñoñoñuñ osoeru mitarime sibirigakimiñ me ñonemañ enoreko señañbañiñ fukekimiñ. Iñoji akon mimitari Raunoñuñ fukegayoñ, go gakere “Mo fukego?” miku ogogo osoeru buñoine mitariege? Onu.

*Saki bobore siñañ bobo buño*

---

\* **4:10:** Qoq 3.34

<sup>13</sup> Nono kaje ruaniŋ! Goine nono sakiŋaŋuŋ ba ropeku inŋ miegobi, “Niŋo muŋambe me yogo yo bokeru taŋ oi me oi oo raru rojiki-bajiki eru monen yasogo poreru gosa moakon gobenen tariko oone kirieru warekimiŋ.” Nonji ore eru inŋ najiŋbe maneniŋ: <sup>14</sup> Gogonaŋuŋ yogo uruŋu gonimiŋ, nono oi so mane mukugobi. Nonore gogonaŋunde fuŋne oi uruŋu? Oi ju kuande sogo damaŋ pomponine yobu fukeru peku mataeiŋ. <sup>15</sup> Ore eru nono inŋ mibi sagaiŋ, “Ofonde maŋ aŋiineji nonunde oŋu eko jiŋoke gonoben ine, oŋu oŋu eru rokimiŋ.” <sup>16</sup> Oŋu so miegobiyon, omaine yobu jauba-iriŋbiriŋ eru nono-nanunde sakiŋaŋuŋ ba ropeku miteŋ gaegobi. Eebobo sosowo oŋuine oiŋi sembene fukega.

<sup>17</sup> Buŋone mitaribemiŋ ore eru inŋ migo: Moji mosi fiine eku baiŋ ore fuŋine mane mukuru oi so eku baiŋ, inŋoji agiburaŋ ega. Oŋu.\*

## 5

### *Niŋigo meboŋaŋuŋke yonore siŋaŋ bobo buŋo*

<sup>1</sup> O niŋigo meboŋaŋuŋke, nono kaje ruaru buŋone yo maneinebi: Suroŋqoŋo joisereren painaŋuŋgo ropeiŋ, ore eru bibi esorieru oŋga jojoraku kuyoinebi. <sup>2</sup> Monen meboŋaŋuŋji gorega forega. Kakara eru wofu yonŋoji kambaŋ marikuŋaŋuŋ kitiqoti eku goegobi.\*

<sup>3</sup> Nono damaŋ tatariine yoo pi, kare (car) eru mebo goine goul, silwaji babaine oi paio paio roru qojugabi pega, oi jukuwiji kema foreko kufen

---

\* **4:17:** Qoŋ 27.1      \* **5:2:** Mat 6.19



baku pega. Kufen eru jukuwi oiji munan moge onjuine peku funnenanun daman tatariine yoo ini yaduin: Nono gogonanun monen meboo kiperu bojiqojibi jangaru mataeme sibiriganimin. Kufen eru jukuwi oiji jo borun onjuine saki funanun onuakon jo forein. <sup>4</sup> Nono yo manesuinebi: Gio bobo ninigo gioyanungo kiobambanja baku kofo eru wou qinjij unugaru gobun, nonoji yonore furiyanun oi dukun paiineo sabarebun. Nono yonore kuyo nunun-nununyaun manegobi me mata? Kuyo wosiyanun oiji Ofon Anutu, usun sosowore Rauinere kajeineo raka foreko manega.\*

<sup>5</sup> Nonoji morengo yo ya funne funne jinorara bine qa nareru batiqatiine tomiri goku saki fure jeribari eku aninanun bobomuku eeku gobun. Morende jijineji kipe nabeko jebe kokoine kosa ruaru kanenji nonone taki tomiri noku gobun. Anutuji bunonanun mitarime nabebi komeniminde damanyaunji ware maigain, daman ore jaueru jijinanunke fukeru gogobi. <sup>6</sup> Ninigo bakare bunoyanun tomiri nono so kiso enarebi jibu bunoyanun mitariru kosa yabebi komeku gobun.\* Onu.

*Yobin maneku karieru osigaru onga wosiru goinebi.*

<sup>7</sup> O mankerisie ogopune, nono Ofonji warein ore odigaru daman botuine yoo maneku karieru yobin osigaru dimainebi. Onu dimaku sasari

---

\* **5:4:** Dut 24.14-15      \* **5:6:** Bunjo ore funne mo oi ini: Nono ni bakare bunjoine tomiri jibu bunjoine mitariru qabi komeya, inoji nono moke so qomuku nabeegea.

ɲire kamasiine oi manesuinebi: Injoji uqo munjan morengo sariru dimaku foriine furiine ropekiine fukeiɲ ore yameɲ keku odigaega. Yameɲ keku odigaru goko kue pasega damaɲineo wareko moke odigame kueyoiko damaɲineji ware fukeega. <sup>8</sup> Nɔɲo oɲuakon yobiɲ osigaru maneku kariere dimainebi. Ofonji moke wareiɲ ore damaɲineji bembengaga ore eru maɲ-ɲaɲuɲ qo-juɲaru qɲi qaku dimainebi.

<sup>9</sup> O maɲkekerisie ogopune, Anutuji buɲoɲaɲuɲ mitarime yobiɲ egu bofukeniɲ ore ɲoɲo-ɲaɲunde botugo buɲo mikeson eku maɲ-ɲaɲuɲgo ɲunuɲ-ɲunuɲ so mimi eku goinebi. Maneniɲ, mimitari Rauineji bombengaru mendigo dimaga. Oɲu. <sup>10</sup> Maɲkekerisie ogopune, kajeqouɲ ɲiɲigo yoɲoji ronekon Ofonde tinao Biɲe buɲo mikabuɲ sisikonkon eyarebi maneru jibu maneku kariere yobiɲ osigaru yameɲ keku gobuɲ. Nɔɲo yoɲore kamasiyaɲuɲ manesuku kufu kadiyaɲuɲ boyoberu goinebi. <sup>11</sup> Goineji yameɲ keku yobiɲ osigaru goku gbiɲ ebuɲ, niɲo yoɲore “Ii-ia ki-waqawaineke!” migobeneɲ. Ni tinaine Job (Hiobe) injoji sisikonkon maneru jibu yameɲ keku gbiɲ eya, oi manegobi. Gbiɲ eme tatariineo Ofon ɲonemaɲ Rauine fukeru ɲone noberu embon eega, injoji seɲɲiɲbaɲɲiɲine oteme goya. Nɔɲo oi manesuinebi. Oɲu.\*

<sup>12</sup> O maɲkekerisie ogopune! Buɲo korun ropekiine mo yo mibemiɲ. Nɔɲo buɲo oi me oi minimiɲ, oi mimipaɲ buɲoo inɲi so misanaɲainebi, “Buɲone foriineke so fukega ine,

\* **5:11:** Job 1.21-22; 2.10; Kiki 103.8

Sombuŋ Rauineji soine yobiŋ ruame paineo ropeiŋ me morende gemokakuji moreŋ bo-pogame koru roru kema nuigoŋ.” Buŋo oi me mimipaŋ buŋo goine oŋuine oo buŋoŋaŋuŋ so misanaŋgainebi. Oŋu matayoŋ, oŋ-buŋore maneru “Oŋ!” oi akoŋ miinebi eru mata-buŋo ore “Mata!” miinebi. Igoko burure buŋo mibi Anutuji buŋoŋaŋuŋ mitariru geoine bokirieme painaŋuŋgo ropeiŋ. Oŋu.\*

*Mamanesiŋ paiineo oŋga wosibi foriine fukeiŋ.*

<sup>13</sup> Maŋkekerisie ŋiŋigo ŋoŋoreone moji qape-qawakike goga ine, iŋoji Anutu oŋga wosiine. Moji jerio goga ine, iŋoji kiki keku Anutu miteŋ gaine. <sup>14</sup> Ŋoŋoreone moji jibe bame goga ine, iŋoji maŋkekerisie kufufunde minebobo furu yabeme wareru Ofonde tinao jiji sakiineo rau teru iŋo oŋga wosiinebi.\*

<sup>15</sup> Mamanesiŋ paiineo oŋga wosibi Ofonji ŋiŋigo jibeke oi munan qa teko fiaru moke pakereŋ. Agiburaŋ eku jibe bofukeya ine, Anutuji agiburaŋine oi jureru bokeiŋ.

<sup>16</sup> Oŋu fukeko Anutuji munan qa ŋareko fian-imin ore agiburaŋ-ŋaŋuŋ mimifuke eru Anutu oŋga wosieinebi. Ŋiŋigo posiine moji maŋine qojugaru Anutu oŋga wosiin, ore foriineji qem-bibiineke eru usuŋineke fukeiŋ. <sup>17</sup> Ore sosoine mo oi kajeqouŋ ŋi tinaine Elaija. Iŋoji moreŋ ŋi noŋuŋ oŋu goya. Iŋoji kue so wareiŋgo ore maŋine qojugaru yamen keku oŋga wosiko kueji gosa yokaomo eru kaiŋ 6 ore maŋineo moreŋgo so

---

\* 5:12: Mat 5.34-37      \* 5:14: Mak 6.13

wakiya.\* 18 Damaŋ oi tariko moke oŋga wosiko qonikiŋ gobureko kue keku pasega bako uqo munjaŋ moke rekagari fukeya. Oŋu.\*

*Moji tiŋtuŋ rako ogoineji bapigako sagaiŋ.*

19 Maŋkekerisie ogopune, ŋoŋoreone moji buŋo foriinere fuŋne tiriru tiŋtuŋ rako moji oi bofukeru kadi furoineo moke ogagaru ruaiŋ ine, 20 ore eru iŋi manesuinebi: Agiburaŋ ŋiŋigo moji tiŋtuŋ kadiineo rako ogoineji oi oone ogagame maŋine wirieko moke kerisieŋ, iŋoji kome sanaŋine so komeiŋ. Ogoineji oi misi korugo egu rakaiŋ ore sabare teko Anutuji agibu- raŋine boakonŋ oi jureru kefagaiŋ. Oŋu.\*

---

\* 5:17: 1 Kiŋ 17.1; 18.1 \* 5:18: 1 Kiŋ 18.42-45 \* 5:20: Qoq 10.12; 1 Pi 4.8

**Manʒekerisiere Biŋe Quran Jojofɔ Gariine  
The New Testament in the Mape Language of Papua  
New Guinea**

**Nupela Testamen long tokples Mape long Niugini**

Copyright © 2008 The Bible Society of Papua New Guinea

Language: Mape

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

---

PDF generated using Haiola and XeLaTeX on 21 Feb 2024 from source files dated 31 Aug 2023

8278cae8-b7ff-5cfb-8118-7ef9b429ffd9